

## REGLUGERÐ

### um heimilishjálp í Hafnarhreppi.

#### 1. gr.

Samstarfsnefnd um málefni aldraðra fer með stjórn heimilishjálpar í Hafnarhreppi í umboði hreppsnefndar Hafnarhrepps.

#### 2. gr.

Hlutverk heimilishjálpar er:

- 1) að veita hjálp á heimilum um stundarsakir, þegar þess er þörf, vegna sjúkdóma eða af öðrum ástæðum, sem metnar eru gildar sbr. lög nr. 10/1952.
- 2) að veita hjálp vegna veikinda barna eða fullorðinna, ef þeir sem veita heimilinu forstöðu eru bundnir af atvinnu utan heimilis og skulu aðstæður metnar hverju sinni, sbr. lög nr. 10/1952.
- 3) að veita ellilífeyrisþegum aðstoð og umönnun, þegar þeir, vegna veikinda eða af öðrum ástæðum geta ekki séð um sig sjálfir og þarfnast aðstoðar til þess að geta dvalið í heimahúsum, sbr. lög nr. 10/1952 og reglugerð um heimilisþjónustu fyrir aldraða nr. 114/1971.
- 4) aðstoð við öryrkja og fatlaða sem húa einir og aðstoð við foreldra með fötluð börn.
- 5) önnur tilfelli sem metin eru hverju sinni.

#### 3. gr.

Samstarfsnefndin ákveður hvert form skuli vera á umsóknum um heimilisþjónustu.

#### 4. gr.

Samstarfsnefndinni ber að ganga úr skugga um að starfslið sem heimilishjálp stundar á hennar vegum sé hæft til starfsins og skal gefa því kost á að sækja námskeið til að auka þekkingu sína og hæfni til starfans.

#### 5. gr.

Hreppsnefnd Hafnarhrepps ákveður launakjör starfsfólks heimilishjálparinnar. Starfsmönnum er óheimilt að taka við greiðslum eða gjöfum frá þeim, sem þeir veita aðstoð. Starfsmenn gæta fyllstu þagmælsku um það sem þeir fá vitneskju um í starfi sínu.

#### 6. gr.

Fyrir heimilishjálp og heimilisþjónustu skal greitt eftir gjaldskrá er hreppsnefnd setur að fengnum tillögum frá samstarfsnefndinni. Þeir aldraðir, sem ekki hafa aðrar tekjur en ellilífeyri, skulu undanþegnir greiðsluskyldu. Samstarfsnefnd er heimilt að fengnu samþykki hreppsnefndar að gefa eftir hluta af greiðslu fyrir veitta heimilishjálp eða fella niður greiðslur þegar sérstakar ástæður eru til slíkra ívilnunar.

#### 7. gr.

Sveitarsjóður Hafnarhrepps ber ekki fjárhagslega ábyrgð á tjóni sem starfsfólk það, er vinnur á vegum heimilishjálparinnar kann að valda við störf sín umfram það sem bætt er af sérstakri ábyrgðartryggingu sem heimilishjálpin kaupir.

#### 8. gr.

Skrifstofa Hafnarhrepps annast reikningsskil og fjárreiður heimilishjálparinnar og skulu reikningar endurskoðast árlega með sama hætti og reikningar Hafnarhrepps.

Reglugerð þessi sem hreppsnefnd Hafnarhrepps í A.-Skaftafellssýslu hefur samþykkt staðfestist hér með samkvæmt lögum nr. 10 25. janúar 1952 um heimilishjálp í viðlögum til þess að öðlast gildi þegar í stað.

*Félagsmálaráðuneytið, 30. október 1981.*

F. h. r.

Hallgrímur Dalberg.

*Hólmfríður Snæbjörnsdóttir.*

Nr. 654.

27. nóvember 1981.

## GJALDSKRÁ

fyrir Vatnsveitu Vestmannaeyja.

### Fastagjald.

#### 1. gr.

Fyrir hverja húseign í lögsagnarumdæmi Vestmannaeyja skal árlega greiða vatnsskatt.

Þó skal gjald þetta ekki innheimt fyrr en viðkomandi hús getur fengið vatn úr dreifikerfi vatnsveitunnar.

#### 2. gr.

Vatnsskattur skv. 1. gr. skal vera 0,3% af heildarfasteignamati eignarinnar, þ.e a.s. af mati mannvirkja ásamt mati lóðar.

Vatnsskattur skv. 1. mgr. skal hlíta eftirfarandi ákvæðum um minnsta og mesta gjald á rúmmeter í byggingum á viðkomandi lóð:

Íbúðarhúsnæði:	Minnst kr. 1,35 en mest 2,70 kr./m <sup>3</sup>
Vörugeymslur:	Minnst kr. 1,35 en mest 2,70 kr./m <sup>3</sup>
Aðrar byggingar:	Minnst kr. 1,35 en mest 2,70 kr./m <sup>3</sup>

Vatnsskattur samkvæmt framanskráðum reglum skal aldrei vera lægri en kr. 224,00 af skattskyldri fasteign.

Hafi fasteignamat ekki farið fram á húsi, sem hægt er að tengja dreifikerfi vatnsveitunnar, áætla vatnsveitan gjaldið.

### Notkunargjald.

#### 3. gr.

Vatnsveitan leggur til vatnsmæla í hvert hús (hverja íbúð) og skal notandi greiða kr. 2,52 fyrir hvern teningsmetra vatns.

Notkunargjald þetta innheimtir Rafveita Vestmannaeyja á tveggja mánaða fresti, og annast mælaaflestur.

### Vatn til skipa og báta.

#### 4. gr.

Greiðsla fyrir vatn, sem afgreitt er til skipa og báta í Vestmannaeyjahöfn, skal vera kr. 5,00 fyrir hvern teningsmetra, og auk þess kr. 50,00 í afgreiðslugjald, ef vatnið er afgreitt frá kl. 08.00—17.00 á virkum dögum en kr. 100,00 ef afgreiðsla fer fram á öðrum tímum.

Vatn til skipa skal staðgreitt, nema um annað hafi verið samið fyrir fram. Skip, sem fengið hefur vatn afhent, má ekki, að viðlögðum sektum, fara úr höfn fyrr en vatnið er greitt eða um greiðslu verið samið.